

Mile marbhphaisg air an t-saoghal,  
's carach baoghalach a dhàil.  
Cuibhl' an fhortain òirnn air caochladh,  
cha do chleachd sinn maoim ro chàch.  
Tha sinn a-nis air ar sgaoileadh  
air feadh ghleann is fhraoch-bheann àrd.  
Ach tionailidh sinn fòs ar daoine  
nuair a dh'fhaodas sinn gu blàr.

Misneachd mhath a mhuinntir ghaolach,  
's gabhaidh Dia dhuinn daonnan càs.  
Cuiribh dòchas daingeann faoilteach  
às an aon Ti nì dhuinn stàth.  
'S buannaichibh gu rìoghail, adhrach,  
traisgeach, ùirneach, caoineach, blàth.  
'S bithibh dileas chàch-a-chèile  
's dùinear suas ur creuchdan bàis.

Ach 's fheudar dhòmh-sa nis bhith falbh bhuaibh,  
Ghaidheilibh calma mo ghràidh.  
Bu mhòr m' earbsa às ur fògh'ne,  
ged a dh'fhòghnadh dhuinn san àr.  
'S iomadh anacothrom a choinnich sinn  
sa choinneamh bha gun àgh.  
Ach gabhaidh mise nis mo chead dhibh  
ùine bheag, ach thig mi tràth.

Leasaichidh mi fòs ur call-sa,  
churaidhean gun fheall gun sgàth.  
A dhìlse dhligheach rìoghail threuna,  
dhèanadh euchd ri uchd nam blàr.  
'S cinn is colainn chur o chèile,  
sinn 's sibh-fèin a sgaradh fàs.  
Ach togaibh suas ur misneachd ghleusta  
's cuiream fèin rir creuchdan plàst.

Beannachd gu lèir le Clann Dòmhnail,  
sibh a dh'fhòirinn orm nam chàs.  
Eadar eileanan is mhòrthir,  
lean sibh deònach rium gach tràth.  
'S iomadh beinn is muir is mòinteach  
shiubhail sinn air chòrsa bàis.  
Ach theasaig Dia sinn air fuar-fhòirneart  
nan con sròin-ghaoth bha rir sàil.

Sibh a rinn fo làimh na Trianaid  
mise dhìon o mhìorun chàich.  
Mo dhearg nàimhdean, neartmhor, lìonmhor,  
chuir an lìon feadh ghleann is àrd.  
Mheud 's a thaisbein sibh dur dìlseachd,  
's còir nach dìochuimhnich gu bràth.  
A bhàrr gur sibh as luaith' a shìn rium  
toic air tìr 's an talamh àrd.